

TE HEHEURAA API.

I neia i te piha neneiraa a te Ekalesia a Iesu Mesia i te Feia Mo'a i te Māu Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Hamani ihora hoi te Atua i te taata ma to'na ihora huru, i hamani oia ia'na ma te hoho'a o te Atua ra; i hamani oia ia raua, o te tane e te vahine.” Gen. 1: 27.

“Ua parau atura Iesu ia'na, O to'u nei hoi parahiraa roa i ô outou nei e, e aore â oe i ite ia'u, e Philipa? o tei hi'o mai ia'u ra, ua hi'o ia i te Metua; eaha hoi oe e parau mai ai e, E faaite mai ia matou i te Metua?” Ioa. 14: 9.

Nu. 11.

10 Atete, 1909.

Mat. 2.

Te Atua o tei Faaitehia i Roto i te Bibilia Nei

O tei haamorihiā e te Ekalesia a Iesu Mesia i te Feia Mo'a i te Mau Mahana Hopea Nei. Eiaha roa to oe ei Atua ê atu ia'u nei. Deut. 5: 7. E homa e, e mata na râ tatou i te imi i to'na ra huru i faaitehia mai i te parau i papaihia i roto i te Bibilia nei. E huru ê auei to te Atua i haamorihiā e te Ekalesia a Iesu Mesia i te Feia Mo'a i te Mau Mahana Hopea Nei, i to tei haamorihiā e te tahi mau ekalesia Kerisetiano i roto i teie nei ao? E tia roa ia matou ia pahono, E, e huru ê roa to te Atua i haamorihiā e matou i to te Atua atoa i haamorihiā e te tahi mau ekalesia o te ao nei. Te nā ô nei te parau a te Bibilia, “Hamani ihora hoi te Atua i te taata ma to'na ihora huru, i hamani oia ia'na ma te hoho'a o te Atua ra.” Gen. 1: 27. Te parau nei râ

te mau haapaoraa Kerisetiano o te ao atoa nei, Ei parau mau tei papaihia i roto i te Bibilia nei. E no reira te parau atu nei matou e, e tino mau to te Atua, no te mea e, ua hamani ihora te Atua i te taata ma to'na ihora huru mau, e ua papaihia te reira i roto i te Bibilia nei. E te tiaturi atu nei matou i te Bibilia nei ei parau mau. E, e tino to te taata, e e tino atoa hoi to te Atua ra. Te parau atu nei te tahi mau ekalesia o te ao nei, E varua te Atua (Ioa. 4: 24) e no reira aita roa'tu ei tino. Te parau atoa nei to tei haapao pae tahi atoa nei i te Bibilia e, E aroha te Atua (1 Ioa. 4: 8), no reira aita oia e varua. E aroha oia, atira atu ai. Te parau atu nei hoi te tahi atu â haapaoraa e, Ua hape roa outou atoa. Aita te Atua e Varua, aita hoi Oia e Aroha; E auahi aamu hoi to tatou Atua (Heb. 12: 29) atira atu ai. Te parau atoa nei te Bibilia ua tia ta te tahi mau Ekalesia i parau ai ratou e, E varua te Atua. E ua tia hoi ta te haapaoraa pae tahi i parau ra e, E aroha te Atua. E ua tia ta te tahi atu â haapaoraa i parau ra e, E auahi aamu hoi to tatou Atua. Area râ ua hape ratou atoa, no te mea ua hi'o pae tahi noa e ua haapii tamau e aita to te Atua e tino, e aita hoi to'na e mau melo. Ahiri ratou e hi'o i te tahi mau parau i papaihia ra e ite ai ratou e e tino hanahana e te tahuti ore to te Atua.

E ua paraparau ihora oia ia Mose te mata i te mata mai te taata e paraparau i to'na taua. Deut. 34: 10. A hi'o-poa hoi tatou i te parau a te Mesia, o tei na ôraa'tu e, "O tei hi'o mai ia'u ra, ua hi'o ia i te Metua," (Ioa 14: 9) no te mea o te hoho'a mau ia oia no te Metua. Heb. 1: 3. E oti a'era ta Iesu ohipa i te ao nei, ua ravehia maira oia i nia i te ra'i ma to'na tino atoa i te haereraa parahi atura oia i te rima atau o te Atua ra. Mar. 16: 19. Mai te mea ra e e rima to'na, o Iesu te hoho'a mau o te Atua i te man mea atoa ra. Heb. 1: 3. E huru taata to Iesu ia hi'ohia'tu. E Atua râ oia. Heb. 1: 8. Hoê â ia to raua huru. E tino mau e e varua hoi to Iesu. E no reira te parau atu nei

matou e, e tino mau to te Atua, e e varua atoa hoi ta'na. Eiaha ei tino repo tahuti, e tino hanahana râ to'na, te i'o e te ivi o tei ore e roohia mai e te tahuti. E tino repo to te taata, e te vai râ te tau a pohe atu ai oia ra e e ho'i atu oia i te repo i te vahi no reira mai oia ra na roto i te poheraa. E te vai atoa râ te tau e faatiahia to te taata ra tino i nia ei tino hanahana i roto i te tia-faahou-raa mai te pohe maira o tei ore e roohia faahou e te tahuti. Te hinaaro nei te Atua ia riro te taata mai ia'na atoa i te huru i te paeau tino e te paeau varua atoa. E no reira e faariro oia i to tatou mau tino pohe noa e tino tahuti ore. Phil. 3: 2; 1 Kor. 15: 49. Te haamori nei te Ekalesia a Iesu Mesia i te Feia Mo'a i te Mau Mahana Hopea Nei i te Atua mau, oia hoi te Atua i faaitehia e te Bibilia. E tino tona. Exo. 24: 9, 10. E hoho'a te tino taata no te Atua. Gen. 1: 27. Ua hi'o Ioane i te Atua i nia i te terono. Apo. 5: 1-7. Ua paraparau oia ia Mose te vaha i te vaha. Num. 12: 7, 8. Ua hi'o hoi Mose i to'na tua. Exo. 33: 20-23. Ua papaihia na pâpâ ofai e te rima o te Atua. Deut. 9: 10. E faaroo te Atua i te tatou pure. Sal. 34: 15. E pahono mai te Atua i te pure faaroo i amuihia i te ohipa. Mat. 3: 17. Ua hi'o te Atua i ta'na mau ohipa paatoa i hamani. Gen. 1: 31. Ia pee tatou i ta'na taahiraa avae. Eph. 5: 1. Aita hoi matou i faaroo i te Atua faaite-ore-hia e te Bibilia nei, oia hoi te Atua e varua ana'e, e te Atua aita ona e tino. Aita ona e vaha. Aita ona e tua. Aita ona e rima. Aita ona e pae atau e e pau aui. Aita ona e tari'a ia faaroo oia. Aita ona e arero ia parau oia. Aita ona e avae ia haere oia. Te reira huru Atua e mea itea-ore-hia e te taata nei, e e Atua faahapahia ia e te Aposetolo ra e Paulo. Ohi. 17: 23. Te haamori nei matou i te Atua i itehia e te mata (Gen. 18: 13) e faaroohia e te tari'a (Luk. 3: 22) e e fafahia e te rima (Gen. 32: 24-30; Ioa. 20: 27). E ore hoi e haafifihia te mana'oraa ia feruribia to'na huru. E tia i te taata ia pure atu ia'na ma te ite papu e, e pahonohia mai taua pure

tia na'na ra. Dan. 6: 10. E metua oia no to tatou mau varua, e e tamarii tatou atoa nei na'na. Heb. 12: 9. Te haamori nei matou i te Atua o tei hamani i te fenua e te ra'i e te tai e te mau mea i roto ra, oia hoi te Atua no Abrahama, e no Isaaka e no Iakoba. E teie nei â te mahana e au ia outou ia maiti i ta outou i haamori, te Atua tino ore o tei haamorihia e te tahi mau ekalesia o te ao nei, aore râ te Atua no te mau peropheta, e te Atua tino mau ra no te Bibilia nei. —VILIAMU.

Te Mau Ati Inidia i te Mau Amerika

Teie te rahi o te mau Ati Inidia i roto i te hau Amerika i teie nei, oia hoi 274,706. Teie te rahi o te Ati Inidia i reira o tei ahu i te ahu papaa ana'e, oia hoi, 116,333. Teie te rahi o te Ati Inidia o te ahu anoihia i te ahu papaa e te ahu Ati Inidia, oia hoi 43,602. Teie te rahi o te Ati Inidia i reira o te ite ia taio i te parau Beritane, oia hoi 63,147. Teie te rahi o ratou o tei ite ia parau i te reo Beritane, e e huru papu hoi, ia faaroohia e te mau papaa i reira, oia hoi 69,209. Teie te rahi o te moni i faataa-ê-hia e te hau Amerika i te matahiti 1908 ei tautururaa'tu i te mau Ati Inidia i raro a'e i taua hau nei, oia hoi 15,140,292 dara. Teie te rahi o te moni e faataa-ê-hia na te Ati Inidia e te hau, e ua pau i rotopu ia ratou mai te matahiti 1789, e tae roa mai i teie nei â, oia hoi 454,787,382. Teie te rahi o te moni e faataa-ê-hia e te hau ei moni no te mau haapiiraa i rotopu ia ratou, oia hoi 9,428,983.35 dara. Teie te rahi o te mau haapiiraa faaamu-noa-tarahu-ore-hia e te hau i rotopu ia ratou, oia hoi 116. Teie te rahi o te mau haapiiraa o tei haapaohia i rotopu ia ratou i te mau mataeinaa atoa e te hau, oia hoi 163. E teie nei, te faaherehere maitai nei te hau Amerika i te mau Ati Inidia i roto i taua hau nei. E na roto i te mau haapiiraa, te noaa nei ia ratou i te ite e te paari. E teie nei ua riro ia ratou ei feia aravihi, e te atuatu hoi, e te tupu nei to ratou maitai i te rahiraa. —MAITIHA.

Te Varua Maitai

Te Varua Maitai parau-atoa-hia ia te Varua no te Fatu (Ohi. 2: 4), e te Varua no te Atua ia (Mat. 3: 16), e te Faa'a'o ia (Ioa. 14: 16), e te Varua Parau Mau ia (Ioa. 16: 13). Oia te hoê no te Atuaraa, aita râ e tino to'na mai te Atua e te Tamaiti mai to Iesu Mesia te huru. Na roto ia'na ra, e rave noa te Atua e Iesu i ta raua mau ohipa i rotou ia tatou nei, oia hoi i rotou i te mau taata atoa o te ao nei. Ohi. 10: 19. E e na roto ia'na te faaite mai te Atua i te ite ia tatou. Ioa. 16: 13. E oia te faaite no te Metua e te Tamaiti. Ioa. 15: 26. E ua haapapu maitai roa Ioane ia tatou i te huru no te toroa o te Varua Maitai i rotou ia tatou nei, oia hoi e orometua oia i tonohia mai e te Metua ia haapii mai oia ia tatou i te mau maitai atoa, e e faaite faahou mai oia ia tatou i te mau parau o tei moe ia tatou. Ioa. 14: 26. E e rave rahi atu â te mau mea ta'na e haapii mai ia tatou, oia hoi e aratai oia i te mau taata i te mau parau mau atoa o tei haapao i ta'na parau. Ioa. 13: 16. E aita roa te hoê taata i ite i te mau mea no te Atua, maori râ na roto i te Varua Maitai (1 Kor. 2: 11), oia hoi te ite nei tatou e, e faaite mai oia i te mau mea atoa a te Atua ra, te mau mea o te vai na, e i te mau mea te vai nei, e te mau mea e tupu a muri nei. E no reira e ite ai tatou e, oia te tumu no te mau ohipa maitai atoa ra, e no reira a feruri maitai ia tatou, no te mea ia ore te Varua Maitai e parahi i roto ia tatou, eita e tia ia tatou ia rave i te hoê ohipa no te Fatu.

“E teie nei, e faaite atu vau ia outou, aore roa e taata na te Varua o te Atua ta'na parau, e parau ia Iesu e, ua anatemahia: aore roa e taata e tia ia parau e, o Iesu te Fatu, maori râ o tei parau i ta te Varua Maitai ra.” 1 Kor. 12: 3.

E i ta tatou imiraa ia ite tatou i te tahi mau taata, aore râ te hoê ekalesia, ia ore ia farii i te Varua Maitai na roto i te tuuraa rima, ei aratai no ratou. E taa maitai ia tatou e

mea hape ia. Heb. 6: 1, 2; Ohi. 8: 14-19. Aita e tia ia tatou e faataa i te varua taata e te tino, maori râ ia pohe te tino; e hoê â ia te Ekalesia e te Varua Maitai. Ia faataa raua, e mea pohe ia te ekalesia.

E teie nei, te ite nei tatou e, aita e tia ia tatou ia noaa i te ora mure ore, maori râ ia roaa i te Varua Maitai. Ioa. 3: 5. Aita te pahi auahi e tere maori râ ei auahi tei roto ia'na o tei faatupu i te puai, e na reira atoa ia tatou, aita tatou e tae atu i te basileia ma to tatou iho mana; na te Varua râ e tauturu mai ia tatou i te haapao i te mau ture a te Atua, te ravea ana'e ia no tatou e noaa i te ora mure ore. E no reira a feruri rii tatou i te ravea e faariro tatou ia'na ei aratai ia tatou i to tatou haerea i te ao nei, ia ore tatou e topa i roto i te mau ino, no te mea te ite nei tatou e aita te mau taata atoa e noaa i te Varua Maitai ia ratou o tei ore i haapao i ta'na ra parau. Ioa. 14: 16, 17.

E no reira, ia hinaaro tatou ia'na, a faaineine i to tatou mau tino ei parahiraa no'na, no te mea to tatou mau tino, to'na ia hiero (1 Kor. 6: 19), e aita roa oia e parahi i roto i te hiero viivii; e no reira eaha te ravea no tatou e faaineine i to tatou mau tino ia ore ratou e riro e hiero viivii e te faufau? Teie ia, "E tatarahapa e e fariu mai, ia paraihia ta outou mau hara" (Ohi. 3: 19), oia hoi, "e tatarahapa, e ia bapetizohia outou atoa i roto i te i'oa o Iesu Mesia ia matara i te hara, e horoahia i te Varua Maitai." Ohi. 2: 38. E teie nei, e ite tatou e na roto i te tatarahapa, e te bapetizoraa, e te tuuraa rima e farii tatou i te Varua Maitai, e na'na hoi e aratai ia tatou i te mau parau mau atoa. Ioa. 16: 13.

Teie nei, ua fariihia te Varua Maitai e tatou, e i muri mai ia haamata faahou tatou i te rave i te mau ino, e e haere noa i te taiata au ore roa i te Atua, ei reira e pee ê atura te Varua, e vaiiho noa oia ia tatou iho, e na te varua o te diabololo e aratai atu ia tatou i te vahi pouri taotao, e te meha-meha. E no reira eiaha tatou i vare i to tatou iho mana'o-

raa e, e tia ia tatou i noaa ia'na, e i muri a'era e haamata faahou i te raveraa i te mau peu au ore roa ia'na, no te mea aita oia e faatia i tera huru ohipa, no te mea te hinaaro nei oia i te mau taata o tei tatarahapa mau i ta ratou mau hara. No reira, a araara maitai tatou i te raveraa i te mau ture no te Atua. Eiaha tatou ia ô noa i roto i te mau haapaoraa ma te feruriraa ore, no te mea te araara maitai nei satani e ta'na mau melahi, e ia ore tatou e feruri maitai roa e e maiti haere noa i te mau mea no te Atua, e riro tataui ei mau tavini no te diabolô.

“E faaroo mai, e tau tamaiti, e farii mai i ta'u nei parau, e e riro to oe ra mau matahiti i te rahi i te oraraa nei. O te e'a o te feia paari ta'u e haapii atu ia oe nei. Te aratai nei au ia oe na te mau e'a mau ra, e ore e opipiri to oe avae ia haere: eia horo noa oe e ore oe e turori. E tapea etaeta i te a'o: eiaha roa e tuua; e vaiiho maite i te reira; o to oe ia ora. Eiaha e hape noa'tu i te e'a o te paieti ore ra, eiaha hoi e haere na te e'a o te feia parau ino ra. Ia atâta i te reira, eiaha e tipu noa'tu na nia iho; e fariu ê atu, e haere ê. Ia ore hoi ratou ia rave i te parau ino ra e ore ratou e taoto; ua ere ia ratou i te taoto, ia ore ia hi'a te hoê taata ia ratou ra.” Mas. 4: 10-16.

— PATAMANA.

“A faaroo mai i te mau parau a te Mesia, o to oe Faaora, to oe Fatu e to oe Atua hoi. Inaha, aore au i haere mai i nia i te fenua nei e parau i te feia parau-tia, i te feia parau-ino râ ia tatarahapa: e ere no te feia ora te taote, no te feia ma'i râ; e te tamarii rii ra ua ora ia ratou, aita hoi e tia ia ratou i te rave i te hara; e te hara a Adamu ra, ua faaorehia ia e au, e aita to te reira e mana i nia ia ratou; e te ture no te peritome ua faaore-atoa-hia ia ia'u. E i na reira mai te Varna Maitai i te faaite mai i te parau a te Atua ia'u; no reira, e ta'u tamaiti here, te ite nei au e, i ta outou baptizoraa i te tamarii rii ra ua vahavahahia te Atua. Inaha, te parau atu nei au ia oe, o teie ia ta outou e haapii: e haapii outou i te tatarahapa e te baptizo i tei tia ia ratou i te rave i te hara: oia ia, e haapii outou i te mau metua ia tatarahapa, e ia baptizohia, e ia faahaehaa ia ratou iho mai ta ratou mau tamarii rii e tia'i, ei reira e ora atoa ratou e ta ratou mau tamarii rii atoa ra.” Buka a Moromona, Mor. 8: 8-10.

Te Faraa Piti Mai o Iesu Mesia

“Te haere maira to matou Atua, e ore e mamû noa; e auahi tei mua ia'na i te amaraa, e vero rahi te haaati mai ia'na. E tiaoro oia i te mau ra'i i nia ra, e te fenua nei e haava'i i to'na taata.” Sal. 50: 3, 4.

Te faaite mai nei Davida i te huru o teie nei tau irava i te haereraa mai o te Atua. O vai teie nei Atua? O Iesu Mesia. Tito. 2: 13. Eaha te huru i to'na haereraa mai i te ao nei? Teie ia e auahi tei mua ia'na i te amaraa, e vero rahi tei haaati mai ia'na, e tiaoro oia i te mau ra'i i nia ra, e te fenua nei e haava'i i to'na taata? Ua tupu anei teie nei parau o tei faaitehia mai e Davida? Aita ia. No te aha? No te mea tei te metua ra oia i te parahiraa. Eaha te mau tapao ta'na i vaiiho mai i te ao nei ei faaite i to te ao? E rave rahi ia. E faaroo outou i te parau tama'i, e te aueue roo tama'i, e ara râ eiaha outou e mata'u; ia tupu hoi taua mau mea ra e tia'i; aita râ i fatata te hopea i reira. E tia mai hoi te tahi fenua e aro i te tahi fenua, e te tahi basileia e aro i te tahi basileia; e o'e hoi, e te ma'i, e te aueue fenua i tera vahi e i tera vahi, matamêhai ana'e râ teie nei mau mea no te pohe. E ia parau mai te taata ia outou, Inaha! teie te Mesia, e inaha, tera, eiaha e faaroo atu. E Mesia haavare hoi te tia mai i nia, e te peropheta haavare e ua rave i te semeio rahi e tae noa'tu te vare i te feia i maitihia ra ahiri i tia. E au hoi te haereraa mai o te tamaiti a te taata nei mai te uira, e anapa i te hitia o te râ, e anaana noa'tu i te tooa o te râ. E haapourihia te mahana e ore te marama e anaana mai, mairi mai te mau fetia o te ra'i. E pau hoi te mana o te ra'i i te ueuehia. Mai tei te anotau ia Noa, oia atoa te haere mai to te tamaiti a te taata nei te amu ra, te inu ra, te horoa ra ia faaipoipo e tae roa a'era i te mahana i tomo ai o Noa i roto i te pahi. Aore roa i ite, e roohia noa ihora ratou e te diluvi, pau roa a'era ratou.

Ua tupu anei teie nei mau parau i faaitehia mai e Iesu Mesia i roto i te Mataio 24: 6, 7, 23, 24, 27, 29, 38, 39?

Pahonoraa: E; ua tupu ia te tahi pae o teie nei mau tapao ta'na i faaite mai i roto i teie nei ao. Eaha te mau tapao tei tupu? E faaroo outou i te parau tama'i, e te aueue roo tama'i. E aro te tahi fenua i te tahi, e te tahi basileia i te tahi, na roto i te mau parau faaroohia, e te roo i riro ai ei maroraa na te mau fenua, e te mau basileia i tupu ai te tama'i i roto i teie nei ao. E o'e hoi, e te ma'i, te aueue o te fenua i tera vahi e i tera vahi. Te iteahia nei te o'e i te fenua nei, te tupu nei te mau huru ma'i atoa i te ao nei, te pau nei i te aueue o te mau fenua papaa, mai te fenua Amerika, e te fenua Itali, e rave rahi atu â. E te faaararaa mai e eiaha e vare i te taata ia parau mai e, inaha teie te Mesia, e inaha tera, eiaha outou e faaroo eaha te tumu i na reira mai ai oia? Te ite nei oia e, e tupu te haavare i te ao nei. E parau te taata o te ao nei e, E inaha oia te medebara e aore ia tei roto i te piha. Te pouri nei te mahana e te marama, e mairi mai te mau fetia o te ra'i. Ua iteahia te poiriraa o te mahana e te marama i to tatou paeau fenua nei. E ua mairi te mau fetia i te fenua Amerika i te m. 1833. Te faaau atoa mai nei oia i te tapao i to'na haereraa mai i te hoê uira o tei anapa i te hitia o te râ, e tei anaana noa'tu i te tooa o te râ. Ua tupu anei teie nei tapao ta'na i faaite mai? Aita ia. No te aha? No te mea aita oia i tae mai. Na reira'toa i te anotau o Noa, oia atoa i te anotau o Iesu; te amu nei, te inu nei, e te faaipoipo nei, e te horoa ra ia faaipoipo, e te vai noa nei â taua mau ohipa ra i teie nei â, e te ite nei tatou i to tatou nei mau mahana. Eaha te faufaa no teie nei mau tapao ta'na i faaite mai i te ao nei? Ei faatupu ia i te tatarahapa e te opuaraa papu i roto i te mana'o o te taata i roto i teie nei ao e, ua fatata te tau e fâ mai ai oia o te piti o ta'na fâraa mai, eiaha ei taraehara ia ora te feia tia'i atu ia'na. Heb. 9: 28. E no reira te hi'o nei te feia haapao maitai, e te paieti i te fâraa hanahana mai o te Atua rahi o to tatou Ora, o Iesu Mesia. Tito. 2: 12, 13.

—RUA.

Te Mau Parau Api no te Tiurai

Ua parauhia e, e Tiurai rahi hoi teie. Ua i hoi Papeete nei i te mau taata no Tahiti nei e Moorea atoa hoi. E mea afaihia mai ratou e te hau. E ia oti a'era te arearea i ò nei, ua faaho'ihia'tu ratou i to ratou ihora mau fenua mau e te hau.

Teie te hoê ohipa apî i Tahiti nei. Ua hamani ihora te hau Farani nei i te hoê patu vairaa tii. E ua faatiahia a'era i te pae tai, fatata a'era i te fare rata. E ua tuu ihora te hoê tii veo i nia iho i taua vairaa ra. E hoho'a teie tii nei no te hoê taata, o Bougainville. Oia te taata Farani matamua o tei tae mai i Tahiti nei, i te matahiti 1767. I taua tere na'na ra, ua haaati oia i te ao atoa nei, e ua tui to'na roo i te mau basileia atoa. E ua faatia a'era te hau Farani nei i taua tii ra e faaturaraa'tu, e e mana'oraa'tu ia'na e a muri noa'tu. E i te hora vau i te poipoi i te mahana 14 no Tiurai, ua putuputu mai te tavana rahi o Tahiti nei, e te tavana o te mau fenua Tuamotu, e te tavana oire nei, e te mau taata mana no te hau nei, e te mau taata no nia mai i te mau pahi, e te mau peresideni mataeinaa o te mau mataeinaa o Tahiti nei, e te mau faehau, e e tiaa rahi taata hoi i pihaiho i taua tii ra. Ei reira, ua a'o mai te tavana rahi, e te tavana oire nei, e te tahi atu â mau taata i te parau tuatapapa no taua taata ra, o Bougainville. E i muri a'era, ua iritihia'i te tapoi i nia iho i taua tii ra. Ei reira ua hi'o atu te mau taata atoa, e ua na ô a'era e, o te hoho'a mau ia teie no Bougainville. Ei reira ua faaoti ai i te mau parau tuatapapa na'na ra, purara a'era te mau taata.

TE MAU HIMENE O TEI HARU I TE RE

Ua riro te rê matamua i Papara	400 farani
Ua riro te rê piti i Punaauia	250 farani
Ua riro te rê toru i Vairao	150 farani
Ua riro te rê maha i Faaa	100 farani
Ua riro te rê pae i Teahupoo	70 farani

O TE MAU HIMENE O TEI HAAMAURUURUHIA E TE HAU

Ua riro ia Pueu, 50 farani; Afaahiti, 50 farani; Afareaitu, 50 farani; Paea 40 farani; Hitiaa, 40 farani; Papeete, 40 farani; Teaharoa, 30 farani; Mahina, 30 farani; Mataiea, 30 farani.

TE RE NO TE HIMENE PAPAA

Ua riro te rê matamua ia Pirae	200 farani
Ua riro te rê piti ia Tiarei	100 farani

NA HIMENE O TEI HAAMAURUURUHIA E TE HAU

Papeari	40 farane	Tautira	30 farani
---------	-----------	---------	-----------

Te Mau Parau Api.

Tei Takume to matou Amuiraa i te Atopa i mua nei.

I te 4 no Tiurai ua pau te hoê fare tipaeraa i te fenua ra o Amerika, i te auahi. Te moni i pau i te hamaniraahia o taua fare ra, oia hoi 200,000 dara.

I te 24 no Tiunu, i te tufaa fenua ra o Penesilavania, ua haruru te hoê apoo arahu, e ua pohe roa e 24 taata, e e 65 taata ua opanihia i roto i taua apoo ra.

I te 20 no Tiunu, ua poiri roa te moana i te mahu. E ua û na pahi e piti, te hoê manuâ, e te hoê pahi tao'a, pihaiho i te fenua ra o Beritane. E ua ino roa te pahi manuâ. Na roto râ i te ohipa vitiviti o te raatira i te faatereraa o to'na pahi i nia iho i te one, aita oia i horomiihia e te miti.

Ua tamata ia faatere te hoê pahi reva, i te fenua ra o Alemania i te avae Me. E ua faatere maitai te fatu na'na ra 850 maile i na hora 37. Te mana'o nei te tahi mau papaa e, eita e maoro ia tere noa te mau pahi na ropu i te reva nei, mai ta te mau pahi e têre noa na nia iho i te moana.

Teie te rahi o te mau taata o tei tapeahia i roto i te mau fare auri i te fenua ra o Rusia, oia hoi 181,000, e ua hamani ino roa te hau Rusia i to'na mau taata o tei tapeahia i roto i te mau fare auri. I te hoê fare tapearaa e au noa i na taata e 280. Ua faaî-roa-hia taua fare ra i na taata 1,200, e ua roohia 192 i te ma'i fiva aau, e aita roa te mau motui i tatara i to ratou mau auri i tapeahia i te rima.

Ua tupu te hoê ati rahi i te fenua ra o Rusia i te 20 no Tiunu. I te tereraa'tu i te hoê opupu mata'i i nia i te reva nei, ua tae oia i nia roa, oia hoi, ua au ta'na vahi i noaa i nia, ia hoê maile i te roa. Ei reira, ua motu te hoê taura na'na. E ua mairi i raro i nia i te fenua nei mai nia roa mai i te reva. E inaha, ua pohe roa na taata toopiti i roto ia'na. Ua roohia taua opupu nei i te ati i te matamua ra, e ua pohe roa na taata toomaha i reira.

I te fenua ra o Niu Zealani, ua mana'o hoi te hoê vahine, e e faahuru ê ia'na ihora ei tane, oia hoi ua faarue atu i tana ahu vahine, e e rave i te ahu tane, mai tei au i ta'na i opua ra. E no reira ua noaa ia'na i te moni rahi na roto i te haavareraa'tu i te mau taata. E i muri a'era ua faaipoipo oia i te hoê potii apî ei hoa na'na ra, i te oire ra o Otago i te mahana 27 no Me. E i muri iti a'era ua itehia e te mau taata i reira e, e ere hoi teie te vahine, e vahine haavare e e faahua tane, e e taata faatupu peapea rahi. E no reira ua haru ratou ia'na, e ua tuu ratou ia'na i te haavaraa e ua haava oia ia'na, e ua faautuahia i te utua ia parahi oia i roto i te fare tapearaa e piti matahiti.

I te avae Tiunu, ua ũ na pahi manuâ Rusia e piti. E ua puta te hoê e muri iti a'era, ua tomo i raro i te miti. E ua pohe roa na taata 20 i nia iho ia'na.

I te avae Tiunu i te fenua ra o Amerika, ua haere te hoê taata apî na nia iho i te puaahorofenua i te haere. E inaha i te haereraa, ua patiahia maira e te uira, e ua pohe roa raua e te puaa atoa ra.

Te parahi nei te hoê vahine ivi i te oire rahi o Nu Ati i te fenua ra o Amerika. E vahine moni rahi hoi oia, e e vahine tei aroha'tu i te mau taata veve. Ua horoa'tu na rota i teie nei na matahiti e toru i mairi a'e nei, 15,000 dara i te mau mahana atoa ei tauturu na te taata rii. E te horoa noa nei â i teie nei.

I te mahana 8 no Tiunu i te fenua ra o Ausaralia ua patiahia i te auri te hoê taata papaa e te mau taata ereere i reira. E muri a'era ua amu ihora ratou ia'na. Teie hoi ta'na ohipa i rave i reira, te tiaï noa ra oia i te mau puatoro i te hoê mataeinaa i uta roa. I taua vahi ra, te vai Etene noa ra te mau taata ereere i reira.

I te mahana 22 no Tiunu mairi a'e nei, ua faaaau ia'na ihora te hoê tamaiti o tei parahi i roto i te oire rahi ra o Philadelephia i te pae hitia o te râ ra o te Hau Amerika. Ua parau maira ta'na metua tane ra, teie hoi te tumu i na reirahia mai ai oia ra, ua maamaahia oia. E te tumu o taua maamaa ra, oia hoi puhipuhiraa avaava. Ua pau ia'na na avaava e pae ahuru i te mau mahana atoa ra. E inaha te hopea ra!

I te mahana 22 no Tiunu, ua fanau a'era te arii vahine no te fenua ra o Paniola i te hoê tamarii tamahine. E ua mauruuru hoi raua, no te mea ta raua na tamarii matamua ra, na tamarii tamaroa ana'e ia. E i muri iti a'era i te fanauraa mai o taua tamarii ra, ua haruru na pupuhi rahi 12 ei faaiteraa'tu i te mau taata'toa ua fanau mai ei tamarii tamahine i te utua-fare no to ratou arii. E ua riro te reira ei oaoaraa i to te basileia atoa ra.

Teie te tau mahanahana i te fenua ra o Amerika. E i te mahana 23 no Tiunu i mairi a'e nei ua tupu te veavea rahi i roto i te oire o Nu Ati. E no te veavea rahi roa, ua pohe roa na taata 12. E aita maitai ia taoto ratou i roto i te fare i te po ra. E no reira e tiaa rahi, oia hoi 20,000 taata tei haere e taoto noa'i i nia i te one i tahatai, no te mea ei reira te vahi mata'i apî. Ei reira ua tiaï-maite-hia ratou e te mau motui ia ore ratou ia roohia mai e te ino.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.